

Kálag eche Jemse Ndibned ní kálag

Kálag echë Jemse átélé ehóbé tângene mekan níme bad bé Krísto bétáŋgéné abel pónde ésyāēl á alonǵé ádāb. Bad bé Dyōb ábe bépáŋtédé áte nkōŋsé áte n̄syāēl bōo Jemse ántelée chó. Abēnlédé ngan híin áléb bad bé Krísto tângene metón híin. Mmē metón médii, ábé nh̄on ne ábé atóg, mekəgsen, abé á bwām, áh̄on bad nkōŋtéd, adúbe ne mbeltéd, ngáne bad bé Krísto bétáŋgéné echém abenled, áwón debyée, nselag, kúmbe ne asuded á yāl, ábíded mbakú á yāl e bad, ákum ekáá á tâl, áwesen, ne ákáne.

Jemse awédé áte á kálag tē wê n̄en aá mbeltéd níkag ekuu ehóg ne adúbe.

Nkabtéd ní kálag

Ndibned ní kálag *1.1*

Adúbe ne áwón debyée *1.2-8*

Abé atóg ne ábé nh̄on *1.9-11*

Ákəg ne ákud mekəgsen *1.12-18*

Áwóg ne ábel *1.19-27*

Ngabén eéh̄dnádté *2.1-13*

Adúbe ne mbeltéd *2.14-26*

Ngáne mod a Krísto ábenladté echém *3.1-18*

Mod a Krísto ne mekan mé nkōŋsé *4.1-5.6*

Elébé émpēe *5.7-20*

¹ Mē Jemse, mbaledē a Dyōb ne awē Sāŋgú Yesu Krístəə, mē-éé ntenle nyé enén kálag. Nlente nyé

metúmbé dyôm ne mébe mé bad bé Israel míme
mépánjtédé áte nkõhsé áte nsyā̄l.

Jemse aá bad bédúbe Krístaa
béwõh-’ε debyéé

² A-baányan, pónde ké ehéé echë nyaa e
mekagsen ké ehéé étané nyé, nyétéd nê e’bonj é
yāl áte.

³ Nyêbíí nén bán mímén mekagsen míme
nyékudéé áyāl e adúbe áde nyéwóó, méwéde
nyé nlém á abum.

⁴ Nlém ríwúu nyé á abum kósh á asóg ábel bon
mbeltéd mímén rítyéem bwâm rílôn-ne mbon, ábel
bon nyéewóó’ abé dé mbéb ké ahóg á alongé ádēn.

⁵ Nyé ké ahéé awě atóge’ debyéé, áchān Dyõb aá
ábe mó. Dyõb dōo ábage moosyā̄l debyéé ne nlém
nhóg, ésebán akwognad modmod, ábe-’ε mó.

⁶ Bon pen nzé nyêcháa Dyõb nyêdúbé bán ábe
nyé chõm éche nyésédté mó ésebán nlém ríkáadte
nyé á abum. Mod awě nlém ríkáadte á abum ádíi
néε edíb é nkwě éche éhode’, epub éhúεne’ mendíb
ped enén étimne eníníí.

⁷ Ene ndín e mod eewémtán aá móõkũd chõm
wéε Sāngwéé.

⁸ Adii mod awě awóó nlém míbe, eechāhñád-taá
hõm ahóg áyāl e kéchéé éche ábeléé.

Betóótõkē bé bad ne behñ bé bad

⁹ Mod a Krístõ awě eésě etógnén á’sõ é’ bad
bémpēe atāhñéné abé kúmbe nzé Dyõb áchāgté mó
ámín.

¹⁰ Mod a Krístõ awě adé etógnén á’sõ é’ bad
bémpēe atāhñéné abé kúmbe nzé Dyõb ásúdté mó.

Nhóbe nén áyāle āmaá melemlem ngáne ébéenéé mbonja e nkáákəə awě adé á ahín-tê.

¹¹ Nzé enyɛn ɛpene ne ngíne ábe e'hyé bé ekíde é'belé é'hyáád ane nkáákəə, éche mbonja-’ɛ ébelé ésoo, e'boŋ é'bāb-pe é'belé é'maa. Melemlem nê d́ó behɔn bé bad bémaa'é anan áde b́ananéé nímāb nhɔn ámbíd.

Jemse ad mekəgsɛn méəhūu'é ẃe Dyɔb

¹² Nnam ne kénzée awě awěséné mekəgsɛn, áyāle nzé atómé nímé mekəgsɛn áte, Dyɔb débe mó nsábe níme nídé alongé áde áhóbé aá ḿóɔbě bad ábe bédáá mó.

¹³ Nzé mod akudé mekəgsɛn eetəŋgenéé ahób aá, “Mḿen mekəgsɛn méhúú ẃe Dyɔb.” Mod eéhēlē-se ákəg Dyɔb ne ebébtéd, melemlem ngáne Dyɔb-pe déekəgée mod ábel mbéb.

¹⁴ Mewēmtɛn mé mbéb mé mod mwěn ḿó mékəə boŋ ahún á mekəgsɛn-tê, ene pónde'-aá nímé mekəgsɛn métédée mó nlém á abum boŋ mehaŋ mó.

¹⁵ Mḿe mewēmtɛn níme mébāg mod áte ḿó-'aá mépɛene mbéb, nzé nímé mbéb-pe níkwógé mod áte, ńpiinad mó kwééd.

¹⁶ A-baányan bé edəŋge nyéedōgnād.

¹⁷ Nde e bwām ké ehée ne kéchéé éche éloné mbon éhúú ne Titée awě adé ámín. Titée mó ahəgé bwēm é'syāāl ábe é'pene ámín. Abén bwēm é'pene-’ɛ nhəŋlén ne nhəŋlén, boŋ Dyɔb pɛn déehəŋlanné.

¹⁸ Dyɔb d́embel ntíi ábe syánē alongé dékɔlē abe áde ámbéé syánē échē eyale é mbále. Ambel nê ábel boŋ átíntê e nímé nhəgtéd ńsyāāl, syánē débê ngáne mbote e'só echě bébagée mó née mende.

*Jemse aá bad bé Dyöb bébele
ngáne eyale é Dyöb éhóbéé*

¹⁹ A-baányan bé edəŋge, nyébii nímén mekan. Mod téé ábê mehél áwóg dyam áde mod ampée áhóbéé, mod eewámsán dyam ahób pen, mod eewámsán-ne alin.

²⁰ Melingá mé mod méemwagké-se ábēl mekan míme Dyöb áhedéé aá ábel.

²¹ Né-óó nyétede mekan mé mbinde ne mekan mé ebébtéd mésyāāl míme nyébeleé. Ne asuded á yāl ásyāāl, nyékob eyale éche Dyöb áwéné nyé á nlém-tê. Echê eyale chóó Dyöb ábenladté áson ádēn alongé.

²² Nyébele ngáne eyale éhóbéé. Nyéēdōgē yāl se nyéwōgē chó wógēn.

²³ Kénzée awē awóge' eyale é Dyöb, ésebán abele' ngáne éhóbéé, adii née mod awē anōne' ábe e'só á dyené.

²⁴ Amaá eche yāl anyín, bon akε áde ákagké, abelé áchatén ngáne e'só é'díí mó.

²⁵ Bon bad ábe békoo' mbéndé echē etəŋgéné anōn áte, mbéndé eche ehúde' bad á mehan, nzé béhíde chó ngáne éhednadté saké bán béléá' chó bon béchatén-ne, bon pen, béhíde chōm éche éhóbéé, Dyöb dénaméd bó áyāl e kéchéé éche bébeleé.

²⁶ Mod ké ahée awē awémténé aá móbele' ngáne Dyöb áhedéé bon eekóbe éche echém, ene ndín e mod adoge eche yāl, ádē abele á Dyöb-pe, áde ngēn.

²⁷ Abele Dyöb nyaa eche esáá ne eche etəŋgéné á'sō é' Dyöb Titée, adii ānōn menyuu ne bekúd ábe bétage', ne áchāə yāl bwām ésebán mekan mé mbinde mé nkōŋsé méwóge mod áyāl.

2

Jemse aá béētēde baahóg etógnén ábiníi-’ε nkójtéd

¹ A-baányan, nyé nêṅgáne bad ábe bédúbpé eched Sán, Yesu Krístəə, Sánḡwéé awě échē edúbé échábé ámīn, nyéetəṅgenéé née nyényíné mod á díd-te se nyétéd mó etógnén ké-’ε nkójtéd.

² Détéd bán mod asólé wéε nyéládné, ahédé nzêd é gól, ahédé-’ε kəse é mbóté, ntógétoke ní mod mómpē ísólé, ahédé mbóté é mbinde.

³ Nzé nyêbagé mod awě ahédé kəse é mbóté edúbé boṅ nyêlángé mó bán, “Hyě édyεε enén kəse e e’dii,” boṅ nyêlángé-’ε ntógétoke ní mod bán, “Tyéém hê,” ké’ε bán, “Dyεé á ndəəb tē hê,”

⁴ né nyêlúmté bán baahóg bétómé ábiníí, né nyêkáadte-’ε bad ne mewêmten mé mbéb.

⁵ A-baányan bé edəṅge, nyéwóglan. Eesaá mbále nén bán Dyəb ápwédé betóótökē bé bad á nkōṅsé te aá bédúbe Krístəə-yε? Adé adúbe dós-’aá adé nímāb nhən, apwədə-’ε bós ábé bad ábe bébē áwē nkamlen. Mmê nkamlen móə áhóbé aá móṣbě bad ábe bédásá mó.

⁶ Boṅ nyéetédεé betóótökē bé bad née dyam. Saá behən bé bad bós bétagte nyé-yε? Eesaá mbále bán bós békene nyé á kóte-yε?

⁷ Eesaá mbále bán bós béhóbe dīn dé edúbé áde ane awě akamlan nyé mekan mé mbéb áyāl-ε?

⁸ Nyéəbēl dyam áde átəṅgéné nzé nyêkoo’ mbéndé e nkamlen eche Krístəə ahíd eche éténlédé nén bán, “Edəṅ mwănyoṅ ṅáne édásá echoṅ yāl.”

9 Boŋ nzé nyêtede baahóg etógnén ábíní-'ε nkóŋtéd, né nyébele mbéɓ, né mbéndé e Dyöb-pe ekóbé nyé née bad ábe bébóó mbéndé.

10 Kénzée awě ahíde mbéndé boŋ abóó mbéndé póg, né abóó mbéndé ésyāā.

11 Mod awě ahóbé aá, “Nyéekábé mesón á ndáb e e'wóngé,” mós ahóbé ámpē aá, “Nyéewúé' bad.” Né-óó, nzé mod eekábé mesón boŋ awúé' bad, né abóó mbéndé.

12 Nyéhóbe dyam, nyébele-'ε mekan née bad ábe bébíí bán Dyöb dékáād bós, nchoo ne eche mbéndé éche éhúde bad á mehaŋ-tê.

13 Mod awě eewóge mod ampée ngol, Dyöb-pe déewógké mós ngol nzé akáadte bad. Boŋ mod awě awóge bad bémpēe ngol, éewógké mbwóg mbwe níme Dyöb ákáadté bad.

Jemse aá nzé adúbe déekii ne mbeltéd né áwédé

14 A-baányan, nzé mod ahóbé aá módūbpē Krístæ boŋ eébéle mekan níme mélūmte bán awóó adúbe, bwâm é'hée é'dé áhed? Adé adúbe áhele ásōŋ adē alonǵé-yé?

15 Détéd nén bán mwānyon a Krísto nhóg eewóó'é chōm éche áhāgkē á yāl, eewóó-'áa ndyééd e epun é bīn.

16 Boŋ nyé mod nhóg alāngé mós aá, “Ekag bwâm, ékud chōm éche éhāgkē, ékūd-tε ndyééd éche édyāgkē.” Nzé nyélanǵé mós nê ésebán nyébage mós chōm éche átógnéné, né bwâm é'hée nyébéle mós?

17 Melemlem nê dós édíí ne adúbe. Nzé mod awóó adúbe áde ébeleéé ngáne adē adúbe áhóbéé, né adē adúbe áwédé.

18 Mod nhóg ālāā mε aá, “Mod nhóg awóó adúbe, aníní-'ε abele mekan mé bwâm,” mε-'ε mētímtén

mó meé, “Lúméd me ngáne mod áhele awóη adúbe ésebán abele mekan mé bwâm, mēlūmēd wε ádēm adúbe áyāl e mekan mé bwâm míme mbelélé.”

¹⁹ Edúbpé nēn wεé Dyōb ádíi ahóg. Nê adé bwâm. Kááηne e’ dāádāη bé mbéb bómpē é’ dúbpe nê, é’ nā-’ε ne mbwóg.

²⁰ A-eyókél é mod, ehede wεé bélúmed wε nēn bán nzé mod awóó adúbe boη eébēlē ngáne adē adúbe áhóbéé, né adē adúbe déesaá dyamdyam-ε?

²¹ Cheé ênkǎη boη Abrahamε, awesyánē sáá ambáá, ákobnéd á’sō é’ Dyōb née mod awě abele’ mam míme Dyōb áhóbé? Saá akwēntēn áde ânkwēnténné ábe awe mwǎn Aisige née mende-yε?

²² Nyēnyíné nēn bán adúbe áde Abrahamε ne míme mbeltéd békágé’ áá ekuu ehóg, míme mbeltéd-te mēnkǎη áde adúbe álón mbon.

²³ Nēn dēmbēl eyale é Dyōb ényínnēd mbále ngáne éténlédé nēn bán, “Abrahamε andúbé Dyōb. Nēn dēmbēl Dyōb dēnkob mó nēngáne mod awě abele mekan míme métāηgéné.” Né-óó, bad bēnchǎg Abrahamε bán nsón a Dyōb.

²⁴ Nyēnyíné nēn bán mbeltéd mí mod mbēle boη mod ákobnéd á’sō é’ Dyōb née mod awě abele’ mekan míme métāηgéné, saké adúbe dēmpen.

²⁵ Melemlem nê dōó émbēē ne akwalεε awě béchágé’ áá bán Rahabε. Ankobnéd á’sō é’ Dyōb áyāle bad bé Israel ábe bēnlōmmē bán béhyε bēnān dyad áte á mesōm-tē. Ankōb bó nken, abídéd-te bó á dyad-tē, nzii empée á mesōm-tē.

²⁶ Ngáne yāl e moonyoη echě eewóo edāádāη éwédé, melemlem nê dōó adúbe áde déekǎg ne mbeltéd áwédé.

3

Jemse aá mod-té akamlan échē echém

¹ A-baányan, nyé bad híin nyéebág bemeléede bé eyale é Dyöb. Nyébi bán Dyöb dékāād se bemeléede tómaa ngáne ákáádté ábíníí bad.

² Syánē baásyāāl debēle mewusé á ríhóbtéd. Kénzēé awě éēbēlē awusé á ríhóbtéd adii mod awě ádē abé átyéémé, ahēle-’ε eche yāl akób ábel bon eēbēlē awusé.

³ Détéd elánsén ne hósε. Nzé mod ahεde aá hósε ébel ngáne áhεdeé, abelé ahé chó chōm á nsəl-tē. Echē chōm chó-’aá ábenladté ályáged ene hósε kéhéé wéε áhεdeé aá ékε.

⁴ Ké’ε détéd elánsén ámpē ne bōle é’mbáá ábe é’dé á edíb é nkwě-te. Kénéε édíí bán é’kálé bwāmbwam, epub é ngíne chó-’aá ékεεne bó, mod awě adole’ ábē bōle mwă abámbe mōō ábenladté ákεεn bó kéhéé áde ádāá.

⁵ Melemlem nê dōō édíí ne echém. Kénéε édíí bán édé mwāmpin á yāl e moonyon, édé kúmbe bwāmbwam áyāl e nímē mbeltéd.

Nyényín ngáne mwă muú ahεle se ahyáád ahín ámbáá.

⁶ Echém ámpē édíí nēngáne muú. Edii pεd e yāl e moonyon póg, ébele’ mbéb ní kamlan yāl e moonyon esyāāl. Ébele’ alongé á moonyon ásyāāl abé nēngáne ákóbné muú, muú níme mbídé á dū-á-muú, níme méēdimē’.

⁷ Moonyon akamlan nyaa é nyam ésyāāl. Akamlan nyam é mehín, ákamlan menōn, ákamlan nyam éche édole abum ásē, ákamlán-ne nyam ésyāāl éche édé á edíb é nkwě-te, ambootéd-te chó akamlan se á mbooted.

8 Boŋ modmod eéhēlēē-se ákamlén echém. Echém édii chõm é mbéb éche modmod éeheléeē-se ákamlén, éloné-'ε ne e'we bé mbéb ábe é'pene' kwééd.

9 Chõo débēnladté âken Sánjú Dyõbe, awêd Titée, chõ-'aá débēnladté âbe moonyon ebómán. Moonyon mós-'aá Dyõb áhágé áwágen mós.

10 A melemem mé nsəl dõo e'yale bé mekenag ne ebómán bébidéé. A-baányan, eetāngéneé abé nê.

11 N'yélé mé edíb nhóg méeheléeē-se mébidtē mendíb míme mésáá ne mé mbinde abided ahóg.

12 A-baányan, alín dé asáá déeheléeē-se áchyáá e'pum é píε. Ké'ε alín á sabé déeheléeē-se áchyáá e'pum é' mesáá. Edíb-pe éche ébidte mendíb mé nkwe, éeheléeē-se ébidéd mendíb míme mésáá.

Debyéé áde áhúú ne Dyõb

13 Mod adé átintē echên awě awóó debyéé awõŋ-'ε nsõŋten-ε? Alúmed nê ne alongé á bwám áde áwóó, áyāl e kéchéé éche ábeléé. Abel nê ne asuded á yāl áde debyéé áde áwóó ábélé boŋ awõŋ.

14 Boŋ nzé nyêwóó kán áte eche edé mbéb, nyêtõŋtan-ne dásõ échen yāl, nyéēbenlád debyéé áde nyéwóó ábel mbéb tãŋene ayáge á mbále, akum áde nyékumεé ekáá á tãl,

15 ene ndín e debyéé eehúé'ε ne Dyõb. Edii debyéé áde áhúú ne bad bé nkõŋsé. Ádii debyéé áde áhúú ne bad ábe béewóo Edáádãŋ é Dyõb, debyéé dé edáádãŋ é mbéb.

16 Kéhéé wée bad béwóó kán áte echě edé mbéb, bétõŋtãn-ne dásõ échab yāl, mpuuted mbélé mbé, nyaa e ebébtéd ké ehéé-'ε ebág áhed.

17 Boŋ debyéé áde áhúú ne Dyõb áde nhãŋlén. Kénzée awě awóó áde debyéé eewóó'ε atón dé

mbéb ké ahóg áyāl. Ene ndín e mod adəə nsan, apwiitad, achede yəl áwóglən bad bémpēe, awóo ngəl bwámbwam. Abenle bad mekan mé bwám ésebán akwəgnad modmod, abele-’ε nê ne nlém nhóg.

¹⁸ Nzé bekóm bé nsan bébele nsón míme mípεene’ nsan átíntê e bad, nê débəl bad bébelé mekan míme Dyöb áhədεé.

4

Jemse aá bad bésuded yəl, Dyöb ákamlən bó

¹ Cheé épεene nzum ne nslag átíntê echên? Eesaá mbále bán esíí é awónj á bwēm éche éwane nyé nzum áte, chów ékəə’ bonj nyébelé nén-ε?

² Ehede chöm bonj weékudεé chów, nê ábélé ewúú mod. Ewóó esíí áte bwámbwam ákud chöm bonj weéhεεé chów akud. Nê ábélé nyésenle, nyéwanne-’ε nhóg ne aníníí nzum. Nyéékūdεε chöm éche nyéhεdεé áyāle nyéēsēdtεε Dyöb chów.

³ Nzé nyéhεdne Dyöb chöm, nyéékūdεε chów áyāle nyéhεdne chów mewēmtən mé mbéb. Nyéhεde bwēm dásō áwóged échen yəl menyinje.

⁴ Nyédé nêngáne bad ábe bédé á ndáb é mewónjé, bonj béré békābē mesón. Nyéēbii’é bán ábane nlém ne mekan mé nkōjsé ábele nyé bad bé ekəyí bé Dyöb-ε? Né-ów kenzéé awě adəə nlém abane ne mekan mé nkōjsé, ábelé eche yəl mod-a-ekəyí a Dyöb.

⁵ Nyéwémténé bán ngên-εé éténlédé á kálag e Dyöb nén bán, “Dyöb ábánné nlém aá edəədəŋ éche móhédé syánē áte, ébê échē, adé-’ε kónjí ne chów-ye?”

⁶ Boŋ Dyöb ábage syánē nsimé abε ne abε. Nê dó-'aá ákáá boŋ étenléd á kálag e Dyöb nén bán, “Bad ábe bédé kúmbe, Dyöb ákunnad bó yǎl, boŋ ne bad ábe bésúdté yǎl, Dyöb ábage bó nsimé.”

⁷ Né-ᶑᶑ, nyésuded yǎl á'sō é' Dyöb. Nyéwúen Satanε nló áte. Nzé nyêbelé nê, m-ε ätōm mehélé.

⁸ Nyépe Dyöb benben, mómpē äpě nyé benben. Nyé bad bé mbéb, nyésôg mbéb abεl. Bad-te ábe béwóó nlém míbe, nyébane mímen nlém ábel mekan míme mésáá.

⁹ Nyésuden áyāl e mímen mbéb. Nyélebe', nyéchyε-ε. Nyésôg awᶑᶑ, nyélebe' lebén, nyésôg menyinje awóg, nyésuden sudnén.

¹⁰ Nyésuded yǎl á'sō ábe Sáŋgwéé. Nzé nyêbelé nê, ächǣgēd nyé.

Jemse áá mod eekáádté mwǎnyan

¹¹ A-baányan, nyéehóbé nhóg ne aníníí mam mé mbéb á yǎl. Kénzée awě ahóbe mwǎnyan mam mé mbéb á yǎl, ké'ε akáadte mó, né ahóbe mbéndé e Dyöb mam mé mbéb áyāl, né ahóbe-ε aá ene mbéndé eéboo'é. Nzé ehóbé wεé mbéndé e Dyöb eéboo'é né weébelēē chǣm éche mbéndé éhóbé aá bébel. Boŋ né etédé etál échě éesé échôn ábē mod awě akáadte.

¹² Mod nhóg mwěmpen-εé adé awě abage' mbéndé, mwěmpen-naá akáadte bad. Mwěmpen-εé ahεle ásōŋ alongé á bad, mwěmpen-naá ahεle abébed dó. Boŋ wε, nzé-módé édíí ákáad mwǎnyon?

Jemse áá mod eebág kúmbe

¹³ Bᶑᶑb-pᶑᶑ, nyéwóglan, nyé bad ábe nyêhóbe bán, “chii ké'ε chǣn, séēkě dyad dekalengᶑme,

sēēdyéé áwed mwě nhóg, sékābē nyongé, sékudé-'ε nsyáη.”

¹⁴ Nyébíí dyam áde débenléd chān-ε? Chán nyébíí bán alongé áđen ádé? Alongé áđen ádíi nēngáne mbag. Ebāg á esón é pón dé, ámbíd enê, weenyínéé chó ámpē.

¹⁵ Chōm éche nyétāngéné ahób édíi nén, “Nzé Dyōb ákwénténé, né séēbē á alongé, sébēl-ε áđen dyam ké'ε ádííí.”

¹⁶ Bon bōb, nyētimé nyékume ekáá á tâl ne kúmbe esyāál. Enén ndín e akum dé ekáá á tâl eetāngeneé.

¹⁷ Né-ó, kénzée awě abíí dyam á bwām áde átāngéné abel, bon eébele dós, abelé mbéb á'sō é Dyōb.

5

Jemse aá behān bé bad bétéd pón dé

¹ Nyé behān bé bad, nyéwóglan mε! Nyéchyε', nyéhágke e'saád áyāl e metake míme mépií nyé.

² Mmén nhān míme nyékúme mí máá abō, síi-'ε é máá nyé asāη adyé.

³ Echen gōl ne sílva éche nyélimmé ásē, é máá ngag akób. Ene ngag eche ekóbé ábê bwēm, chóó ēbēl bon Dyōb ákógsén nyé, émād-ε nyé ásē née muú. Nyékúmmé yāl nhān enén pón dé echē edé benben ne e'pun bé asóg.

⁴ Nōné', weesābpεé bad ábe bēbénlé wε nsón á nzag-tê. Etimé edogé bó dogén. Nén ábélé ábê bad ábe wēesābpεé ádab awé áwógnad á'sō wée Titée, Dyōb á Ngum.

⁵ Abé áde nyédíí á nkõḡsé hén ádíi âchog alongé, nyêbele-’ε kéchéé éche nyédáá. Nyêkódte nímen mewêmten, kénéε nyébíí bán epun éche Dyõb dékõgsennē ábē bad bé ekoyí ékwógé ape.

⁶ Nyêhóbé bán bad ábe bébele mekan níme métáḡgéné á’sō é’ Dyõb bédé bad bé mbéb, nyêwúú-’ε bó. Béehelεé nyé atyémen.

Jemse ad bad béwesen metake

⁷ Né-ó a-baányan, nyéwesen kóáḡ Sánygwéé ápe. Nyétêd eláḡsén ne mod awě abele nzag. Abelé ásin kóáḡ ne póndé echě ápādtē mbote é bwâm. Awesan kóáḡ ne á póndé eche mbúú e’só ébootadté achó, ne áde édimtanné achó.

⁸ Nyémpē nyéwesen, nyéwéd-te nlém á abum, nyésine’ epε éche Sánygwéé, édé benben.

⁹ A-baányan, nyéēnyongé áte tâḡene nhóg ne aníníí ábel boḡ Dyõb dééhõbē aá nyédé bad bé mbéb. Nyébíí nén bán mod awě akáadte’ adé nyé benben.

¹⁰ A-baányan, nyétêde e’chemléd ne bekal bé’dáédəḡ. Békálé’áá nkalan á dīn áde Sánygwéé, békudé metake, béwesán-ne nímmê metake.

¹¹ Ne mbále, syāā dechəge bad ábe béwéséné bán bad ábe békudé nnam. Nyéwógé ngáne Jobε ânwesénné áde ákudé metake, nyényín-ne ngáne Dyõb dêmbenlé mó bwâm á asóg. Sánygwéé aboó nlém bwâmbwam awóó-’ε nlém ní ḡal.

¹² Amín e nímmén mésyāā, a-baányan, nyéēbenlād dīn dé nkoḡ nímmín, ké’ε dé nkõḡ nísé, ké’ε chõm émpēe âmwe melě. Boḡ pen, nzé ehóbé“εε” abé εε, nzé ehóbé-’ε “Aáy” abé aáy. Nzé nyêbelé nén, né Dyõb déekõgsénné nyé.

¹³ Kénzée awě adé á metake tē, ákânne. Kénzée awě awóge menyinge, ákóne ákené-'ε Dyōb.

¹⁴ Kénzée awě eedyεε bwâm, áchæg belyáged bé mwembé, békánned mó. Nzé békánnad mó béwōgtē mó dyōg á đin áde Sán gwée.

¹⁵ Nzé édé bán békánnédé mó ne nlém nhóg, né Dyōb déwōg bó mekáne, nē débēl-ε mod a nkole ádyēε bwâm. Sán gwée ábēl áhídē á anon dé nkole, ádyēε bwâm, ké mbéb-πε mōo ámbenlé Dyōb délagsén mó.

¹⁶ Né-ó, nyépale mbéb áte wée nhóg ne aníní, mod tée ákánned-ε mwānyan, ábel bon nyedyεε bwâm. Mekáne ríme mod awě abele mam ríme métáŋgéné á'sō e' Dyōb, médé ngine bwāmbwam, mébele-'ε nsón.

¹⁷ Elaijaa abédεε moonyon melemlem ngáne syánē. Póndé póg ankáné bwāmbwam aá mbúú eechóg, mbúú enkēnchó-'aá á etún é mwě níláán ne epeđ.

¹⁸ Ambid enē ankáné ámpē, Dyōb ábel mbúú echó, bwēm é'bootéd-ε akwog.

¹⁹ A-baányan, nzé nyé ké ahée atēdté áhíd nzii e mbále e Dyōb, bon mod ampée abelé atimné mbíd,

²⁰ ábíi nén aá, kénzée awě abelé bon mod awě abelé mbéb asóg mbéb abel, né asoó alongé áde mod awě abelé mbéb. Nén débēl-ε mbéb híin ríme ane mod ákébenlé, Dyōb déenōnné mó á đíd.

Mel̃ Mékōōlē
New Testament in Akoose (CM:bss:Akoose)

copyright © 2011 Wycliffe Bible Translators, Inc.

Language: Akoose

Translation by: Wycliffe Bible Translators, Inc.

Akoose

bss

Cameroon

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Akoose

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 18 Apr 2025 from source files dated 29 Jan 2022

0143729f-907e-5098-b6ce-63b1629b8e48